

Fasnacht machen in der VKB 1884

Pfeifen Trommeln lernen

Top Instruktoren

Tolle Erlebnisse das ganze Jahr über

Übungslokal direkt am Messeplatz

Übungstage: Dienstag (Pfeifen)
Mittwoch (Trommeln)

www.vkb.ch

VEREINIGTE KLEINBASLER
FASNACHTSGESELLSCHAFT



1884





Fasnacht 2026 Binggis

«Patrouille Tschüss»

Es fliege scho syt meh als 70 Johre
Kunschtflieger andere Flieger um d Ohre
Im 1964 findet aine – nundefahne
Es muess e Flugshow Staffle aane
Mache mit em Name nit lang Gschyss
Und nenne die Staffle «Patrouille Suisse»
Ihre Flugplatz isch zerscht in Dübedorf, denn in Emme
Egal, es brucht dört uff jeede Fall kaini Memme
Sy fliege bekanntlig in wilde Formatione
Gänn sich per Funk divärsi Informatione
Bi Loopings und Krüzige s isch e Pracht
E Kunststügg, dass kaine inenander yyne kracht
Dr Tiger Uno gitts Kommando duure
Und vo denn aa gitts nüt me z murre

Mit Getöse gohts ab in d Luft in hoochi Regione
Und fliege dört oobe schwiirigi Formatione
Sächs Tiger-Flugi, elegant und üsserscht präzis
Mir wird's ellai vom zueluege scho myys
Für divärsi Aläss im ganze Schwiizerland
Isch d Patrouille Suisse bi jedem Kind bekannt
Für d Landesusschtellig Expo64 – persee
Hett me s Kunschtflugteam s erscht moll richtig gseh
Und so wird die Kunschtflieger Flotte
Scho bald au für Ufftritt im Ussland uffbotte
Am «Royal International Air Tattoo» fliegt die Formation
In Grossbritannien – für die neutrali Schwyz e Sensation

Au z Wänge am Lauberhornrenne
Könne d Hotelgescht nüm lang penne
Und die Griene griege scho wider e Kryse
Will d Patrouille Suisse dört ihri Ehr duet erwyys
Und am Basel Tattoo dien d Cüpli-Gleeser tschättere
Wenn d Patrouille Suisse über d Kasärne duet brättere

Und trotz Beliebthait finde unseri Regierigsnaarre
Me miesst in däm Beraich jetz ändlig spaare
Und e so – s isch laider nit glooge
Isch d Patrouille Suisse bald s letscht moll gflooge
Trotz grossem Protäscht und de grööschte Wette
Losst sich do anschynend nüt me rette
Im 2027 haissts drum für d Patrouille Suisse
Merci für alles, tschau zämme und ... tschüss

Wotsch afo Fasnacht mache?
Scan mi!

